

Les māgraicioux

Tiaind en airrive chu c'te bôle, niun ne saît çò qu'y pend à nèz. Po faire in monde, è fât totes souetches de dgens. En en trove que sont toûedge bin virie èt peus des âtres que sont aidé gregnes, bin mā dains yôte pé. En se demainde c'ment çés-ci sont aivus faîts. Po chur que c'étais in soi que les poirants s'étins engueulaie, ou bin qu'els aint cizolaie è contre-tiûre, dains tos lës câs, le môle ât aivu rempiachu è r'bousse-poi. C'è fât véjenaie aivô d'inche des peuts poues, s'en ât prou po veni malaite. El en fât tot de meinme pare tot è point èt peus léchie ces demés-fôs aivô yote métchaine aivé~~y~~, yôte bêtige. C'ât bin raie qu'en en troveuche que sont in pô aibiéchaunts, in pô dgentis, ès sont aidé mā viries. E fât aivoi pidie de ces teunés que ne sont djemais d'aiccoues aivô quoi qu'en feseuche. Els aimant contrariaie, dire èt peus faire âtrement que les âtres, ç'ât enne pidie quoi.

Dje en l'écôle, els aint ci défât. Tiaind es s'aimusant aivô yôs caimerades, ès se baittant ou bin demoéran~~en~~ in care è teurée, des têtes de blin. Se le raicodjaire y ô fait enne remaîrtche, ç'ât lu qu'é les touës, ès sains tus meu que lu. Si poure hanne n'en sairait ran tirie.

Aivô l'aîdge, çoli ne vînt pe moyou, à contrére. S'en les envie tchie les allemoùsses, c'ment c'étais lai môde dains le temps, ès moinnant in traiyin de tos les diailes. Poétchaint ces qu'y sont aivus n'y sont pe moues. Po des uns, çoli yôs é fait tot piein de bin, els aint vu çò que se pésse feu de l'hôtâ. Bin s'vent de lai grôsse bésaigne, bin prou pojainne chutot po des djuenes. Des côps, enne malriere neûrreture, mains des vêchies piein les mains è les pies. Dains tos les câs, ran de bin po ces māgraicioux.

Le pairpèt ç'ât tiaind ès se vaint faire soudaits, voili qu'en en ô de totes les souefches. En r'veniaint en lai mājon, çoli fait di brut. Tos ces que commaïdant, ç'ât des rancvayes, des fôs, des savaidges, ç'ât des yitainies qu'en en voit lai fin. En y maindge c'ment des poues, en ne doue pe, è nôs faints è crevacie, ç'ât enne vie de bregands, de muries. En nôs fait ri^ptaie c'ment des yievres, è se fât trinaie c'ment des bats dains lai miedge bin épâsse, tot çoli, en se demainde pourquoi?

Dains yôte métie, çoli ne vait ran de meu. Tot ço qu'en y
beye è faire ne convînt pe. C'ât de la peute ôvraidge que les
âtres dairint entrepare en yôte piaice. Es ne sont pe faits
po étre commaindaie; ès voerin tchoisi ço qu'y piaît, bîn à
tchâd, aidé en lai veneutche, en l'aissôte, djemais laivou
l'ouere soueçhe. Des peuris, des mistons de la tot belle
échpèce, paidé.

Tot ço que se péssse à long de yôs ne vât ran. Ces que moin-
nant lai dainse, voué que çoli feuche, c'ât des beujons. E
câse de ces-ci, è fât pâiyie des valmons d'impôts. En ne sait
pe laivou vait c't'airdgent, po chur qu'en en mavie è grants
côps. E fât beyie des subjides en tos ces qu'en demaindant,
en y en embrue dains les baigattes sains se faire de tiëûsain.
Tiaind en sait que ces que fotant des côps de pie en enne pi-
lome en toutchant des grôs moncés, èt peus encoé tos les â-
tres, çoli fait in pô mâ. E y veut v'ni in djoé que les boé-
ches v'lan étre veudes è câse de ces loitchoux que n'en aint
djemais prou.

S'en raiyue in tch'min en enne piaice ou l'âtre, ès ne r'sont
pe d'aiccoue. Çoli n'en vât pe lai poinne, c'étais bîn aivaint,
miedge po ces novâtès. E y aivait de lai groise que beyait in
pô de poussat, niun n'en é t'aivu mâ po meuri. En y on botaie
di godron, mains è y vînt tot de meinme des p'thus qu'è fât
r'chiquaie bîn s'vent. Mâgrè: que çoli é côteie bîn tchie, niun
n'é ran è dire.

S'enne mâjon se baîtit, ç'ât de la pure bêtige, ç'ât encrot-
taie des foûetchunes, po faire piaigi en ces qu'aint des sous
è piaicie. Li encoé, ès ne sont pe d'aiccoue. Es ne s'êtchâdant
pe de saivoi se les ôvries di baitiment aint di pain è botaie
ch'lai tâle, ès s'en foutan pé mâ.

E fât r'chiquaie le môtie qu'étais bîn veyat, qué bousin els
aint moinnaie. E n'y mainquaie ran èt peus po ço que les dgens
y vaint faire, c'étais bîn prou bé. C'ât le tiurie qu'ât in
ordyou que veut dépensie totes les aîmeunes que les prayous
bèyant en lai mâsse. E l'en veut faillait bîn encoé de l'âtre,
tochu des grôs moncés, in môtie c'ât grant.

Le raicodjaire, ç'ât encoé di meinme diaile, è fât aidé di neu

po l'écôle. Dains les poiyes laivou les afaints s'ébaittant, è fât vandlaie tot ço que n'é pus dyère de djèt, qu'ât tra véye, crais bïn meinme dondgerou. Mains po tot rempiaicie, çoli côte brâment tchie. Ci aijebïn les mägraissioux s'étchadant, mains ès predjant yôte tçépra. Co qu'è fât, è le fât, en on bé è renondaie. Dâs qu'ès n'aint pe réjon, els aint toûedje è repreudgie en cés que faint atçhe, meinme ce s'ât po le bïn de tote lai tieumenâtèe.

El é faillu aitchtaie des neuves vêtures po les pompies, qué tairgâ ç'ât aivu. Poétchain, c'étais âtçhe qu'è faillait tchainindgie, ces poueres hannes aivïnt encoé les véyes haiyons de lai "musique". C'étais de lai boinne maitré, mains çoli ne vayait pus ran, tot droit po botaie ès goiyes, taint çoli était eusai. En on trovaie quéque tchôse qu'ât daidroit, pus tchâd èt peus que lai pieudge pésseuche à long.

Se ïn côp ou l'âtre es vaint à cabaret, ès trovant que tot ât tra tchie, quoi qu'ès boiyechïnt. Lai baichatté que yôs aip-poétche yôte breuvaidge à aidé mâ vétie aivô ses môtretiu. Po yôs elle n'ât pe aibiéchaine, elle fait tot le temps ïn peut tchoûeré. S'ès lè poyïnt p'lotaie ou bïn pïnciè, po chur qu'elle n'airait pus aitaint de défâts. E fât recognâtre que les poues ne veniant pé véyes, mains que les véyes veniant poues, c'ât aidé aivu dïnche, è n'y é ran de neu.

E pô près tos les mois, è fât s'alliae faire è copaie les pois meinme s'è n'y en é pus dyère. Ces tchairvôtes de frâtraires, voili des tchies bogres, des voulous que sont rétches tot comptant. Tiaind en muse le pô de poine qu'els aint, le pô de temps qu'è yôs fât po faire yôte bésaigne, çoli fait mâ à tiûre èt peus en lai boéche.

Les paiyišains que piantant di touba, ç'ât des vârans, ès faint echqueprès po empoûegenaie les femous. Ce n'ât pus lai môde de vadgeaie des vaitches, en engréche des toérlats, çoli ne beye quasi pus de mâ, èt peus çoli raippoétche bïn pus. Es se fotant de ces que dains encoé foinnaie, moûechenaie èt peus voynaie. Ces-li faint les mâlïns aivô yôs "machines" mains s'ès n'en ai-vïnt pe ès se fairïnt è crevaie.

Laivou ces maigraissioux veniant c'ment des fôs, qu'è veniant enroidgis, ç'ât tiaind lai fanne yôs demainde de l'airdgent po trovaie ço qu'è fât po le ménaidge, po maindgie chutot. Des rondes pomates tos les djoës, c'ât bïn prou, djemais enne